

*Virgo * μισόγαμος.*

* EUBULUS, CATHARINA.

Eu. **G**Audeo tandem, finitam esse cœnam, ut liceat hac frui deambulatione; qua nihil amœnius. *Ca.* Et me jam tædebat sessionis. *Eu.* Quam vernat, quam arridet undique mundus! Hæc nimirum est illius adolescentia. *Ca.* Sic est. *Eu.* At cur tuum ver non æque arridet? *Ca.* Quam ob rem? *Eu.* Quia subtristis es. *Ca.* An videor alio vultu quam soleo? *Eu.* Vis ostendam te tibi? *Ca.* Maxime. *Eu.* Vides hanc rosam sub imminentem noctem foliis contractioribus? *Ca.* Video. Quid tum postea? *Eu.* Talis est vultus tuus. *Ca.* Bella collatio. *Eu.* Si mihi parum credis, in hoc fonticulo contemplare te ipsam. Quid sibi tandem volebant, & inter cœnandum, tam crebra suspiria? *Ca.* Desine percunctari, quod tua non refert scire. *Eu.* Imo mea refert maxime, qui non possum esse hilares, nisi te quoque videam hilarem. Ecce autem iterum suspiriũ, hui quam ex imo pectore ductum! *Ca.* Est quod angat animum, sed effari non est tutum. *Eu.* Mihi non dices, qui te cariorem habeo sorore propria? Mea Catharina, ne verere, quidquid est rei; * tuto depones his auribus.

Ca.

Μισόγαμος Abhorrens à nuptiis. Eubulus] Bonus cōsultor. Qui bene consulit, εὖ bene, βελτὴ, consilium. Tuto depones] Deponit magistratum, qui se abdicat magistratu: deponit pignus, qui certat: & deponit, qui rem suam servandam tradit alienæ fidei. Sic Horatius, Quicquid habes, age, deponere tuto auribus.